

Empat dapat bantuan SSC

10 MAY 1991

EMPAT pesilat nasional telah menerima bantuan kewangan \$6,500 daripada Majlis Sukan Singapura (SSC), di bawah Rancangan Bantuan Kecemerlangan Sukan (SEAP) tahun ini.

Menurut penolong setiausaha satu Persatuan Silat Singapura (Persisi), Mohd Khamin Said, empat pesilat itu ialah Sheikh Alaudin Yacob, Azman Amat, Abdul Talib Tambi dan Badriah Mohd Hosni.

"Ini merupakan tahun kedua Persisi menerima bantuan SSC untuk rancangan SEAP ini," kata Khamin.

Ia juga merupakan tahun kedua tiga pesilat, Sheikh Alaudin, Azman dan Badriah menerima bantuan yang sama.

"Pada tahun lalu, Persisi menerima \$6,000 untuk empat pesilat, termasuk Abdul Latif Tambi," jelas Khamin sambil menambah setiap seorang pesilat berkenaan menerima \$1,500 bantuan tersebut.

"Bagaimanapun," kata Khamin, untuk tahun ini, Sheikh Alaudin menerima bantuan \$2,000 dan selainnya menenerima tiap-tiap seorang \$1,500."

Setiausaha Persisi itu menerangkan bantuan tersebut akan diterima dalam dua peringkat dan akan diberi secara bulanan.

Namun demikian, setiausaha Persisi itu berharap agar sumbangan ini dapat membantu pesilat-pesilat berkenaan untuk meningkatkan mutu persembahan mereka

dalam menghadapi Kejohanan Terbuka Austria yang akan berlangsung dari 19 hingga 26 Mei ini.

Khamin menyatakan Persisi hanya mencalonkan empat pesilat yang disebutkan itu berdasarkan kepada tahap persembahan dan pencapaian masing-masing di peringkat antarabangsa.

Sheikh Alaudin adalah pemenang pingat emas Kejohanan Dunia di Austria tahun lalu. Azman pula pemenang pingat gangsa dan Badriah adalah pemenang pingat perak dalam kejohanan yang sama.

Bagaimanapun, Khamin agak kecewa kerana hingga saat ini Persisi masih belum menerima sebarang pengesahan mengenai kejohanan yang akan berlangsung di

Austria.

"Kami masih menunggu jawapan daripada ibu pejabat Pesilat di Jakarta, malangnya hingga kini kami belum menerima sebarang maklum balas daripada mereka," jelas Khamin.

Selain daripada mempersiapkan diri untuk kejohanan di Austria itu, pesilat-pesilat Singapura itu dijadualkan menyertai Kejohanan Terbuka Belgium pada November ini.

"Bantuan kewangan ini ia bukan saja dapat meringankan beban perbelanjaan mereka untuk menyertai kejohanan-kejohanan tersebut malah diharap meringankan juga kedudukan kewangan pesilat-pesilat berkenaan bagi menjalani latihan," kata Khamin. — MOHD SANI ALI.



BADRIAH: Pingat perak kejohanan dunia di Austria.